

Sur Flurin Venzin

CR 1981 pag. 395



Siu veginr

Sur Flurin Venzin, in spiritual tenor il cor de Diu, ei naschius igl onn 1900 a Selva/Tujetsch, leusi ella tgeuadad della muntogna. Enserraus da teissas e malsegiras spundas che sburflavan savens lavinunas tochen giu tier il giuven Rein, periclitond la veta dil carstgaun muntagnard, ei sur Flurin tuttina sesviluppaus ad in caracter aviert e grad, ad in giuven che veseva ton la bellezia della natira sco era la malignadad digl ambient. Cheu a Selva gauda il giuven Flurin el ravugl d'ina roscha fargliuns ina biala affonza, cheu frequenta el las scolas primaras, dal temps, nua ch'ins considerava aunc la naschientscha d'in affon per in eveniment e per ina grazia da surengiu. Tochen 30 scolars frequentavan da lezzas uras la scola da Selva, ferton ch'igl entir vitg ha oz strusch pli 30 avdonts.

En la famiglia dil Flurin de Selva e da sia consorta Gada, nata Pally, da Camischolas, regeva il spert della tema de Diu, dell'oraziun e della sempladad cristiana. Quella tenuta ha accumpignau il giuven Flurin dalla tgina alla fossa. Denton haveva il veneratur della «Mumma digl agid de Selva» udiu da surengiu in auter clom muort urbida da Maria: Quei fuss miu giavisch ch'jeu damondel il Segner, quei ch'jeu tscherchel: Avdar ella casa dil Segner tut ils dis de mia veta; contemplar la bellezia dil Segner e star meditond en siu tempel. (Ps. 27). Bein sminava sur Flurin gia lu, ch'il spiritual stetti el center da treis ualts hanai rudials: baselgia, Cristus e mund. Plein speronza d'astgar survir inaga a quella baselgia, a quei Cristus, banduna Flurin Venzin Selva, siu carezau vitg nativ, serenda alla claustra de Mustér per frequentar per in onn leu ina classa della scola reala. Quei cumentava buca el. El senteva pli e pli il clom de Diu alla clamada sacerdotala. El mida classa, empren latin, frequenta 5 onns gimnasials a Mustér per lura serender el collegi della «Mumma digl agid» a Sviz. Leu finescha el siu studi humanistic cun gl'examen de maturidad. L'eleciun della clamada ha buca caschunau grondas difficultads al premurau student; el veseva la gronda e biala raccolta ed ils paucs luvrers. Gl'atun 1922 entra Flurin Venzin el seminari de s. Gieci a Cuera e treis onns pli tard celebrescha el sia emprema messa nuviala ella parochiala de Sedrun. Siu bien e sabi augsegner, sur Hans Giachen Venzin, biars onns plevon de Sumvitg, ha assistiu a quella primizia sco bab spiritual.

Siu operar

Vargadas las festivitads della primizia cun fluras e tschupials, suondan las annadas della veta sacerdotala sil camp de lavur amiez il pievel cristian. Il spiritual vegn buca tarmess sco specialist viado ella vegna dil Segner, siu operar cumpeglia igl entir carstgaun: affons, giuven e vegl, umens e femnas, maridai ed isolai.

El sto saver dir cun s. Paul: Jeu sun daventaus tut per tuts (1. Cor. 9.22). Cun quei idealissem vegn il giuven della muntogna gl'emprem, tarmess giu el marcau grond de Turitg en la pleiv de s. Pieder e s. Paul. Quei ei bein stau ina cuorta provisura. Lu retuorna sur Flurin definitivamein en tiara romontscha. El vegn plevon da Sagogn, da Surcasti, dad Andiast e caplon da Segnas. Igl onn 1926 ei sur Flurin entraus sco plevon ella pleiv de Sagogn ed exact 50 onns pli tard ha el, tenor siu agen scriver, celebrau sia emprema sontga messa sco resignat a Camischolas ella caplutta de s. Onna. (Duront 54 onns de veta pastorala ei sur Venzin vegnius accumpignaus e sustenius da sia sora Josefina sco casarina. -Quei ei in unic cass, che mereta renconuschiantscha ed engraziament, era da vart della s. Baselgia. Ina buna e fideivla casarina ademplescha in grond apostolat della cuminanza). Denterenstattan ils 50 onns de lavur pastorala, onns da sulegl e calira, onns da quitaus e panzieris, onns d'immensa grazia divina. Sur Flurin havess saviu festivar solemnamein siu giubileum sacerdotal ded aur, mo ha preferiu de far quei en tutta tgeuadad. El ha mai encuretg las laudavaglias dil mund curcladas cul vel della gronda vanedad.

Sur Venzin ei staus in spiritual cun in bien humor, cun senn practic-pastoral ed era beinvegnus e beinvesius ella cumpignia dils confrars. Il svilup dil temps e las midadas saluteivlas liturgicas dil secund Concil dil Vatican han buca caschunau grondas difficultads agl augsegner aviert per tut bien, che vegn dalla baselgia e survescha alla cuminanza. Siu optimissem e siu bien humor han beinenqual gadas alzau e dau forza al concarstgaun els quitaus e difficultads della veta quotidiana. Las delegaziuns

dellas singulas pleivs cun lur bandieras han demussau stema ed undrientscha per lur anterius augsegner, e la canzun dil chor-baselgia da Segnes ha commuentau ils presents.

Sur Flurin ha luvrau en ses giuvens onns intensivamein per las uniuns de giuvens, per la guardia de s. Gieri ed ha accumpignau grondas roschadas giuvens sursilvans als exercezis spirituels a S.Pieder (Feldkirch). Da Sagogn anora ha el - sco proviser - aunc pastorau per temps la pleiv de Laax, dau instrucziun religiosa a Flem e giu quitau pastoral e spiritual per las soras digl institut Löwenberg a Schluein. Il viadi da Sagogn a Flem hagi el adina fatg per pedes apostolorum, quei vul dir a pei. Da lezzas uras eran ils vehichels pli scarts che ozildi. - Sur Venzin ei staus in econom. Dapertut ha el giu quitau per las baselgias ed ha bandunau las pleivs senza relaschar deivets. Quei scriva el cun ina certa luschezia en siu diari final.

Serasontga

Ils davos onns de sia veta ha sur Venzin passentau a Camischolas. Sia casa paterna a Selva era daventada gl'onn 1949 l'unfrenda dil barschament de Selva. Silsuenter han ins puspei eregiu ina casa dils Venzins, mo quella, periclitada dalla lavina, ei vegnida translocada a Camischolas, e cheu ha sur Venzin passentau sia serasontga. 80 onns della veta terrestra han impregnau al defunct il patratg ed il maletg della vanedad dil mund, dil vegrin e vargar de tuttas caussas. Nus havein buca cheu nossa dimora, mobein tier Diu. En sempladad ei sur Venzin naschius e vivius, en sempladad e contentientscha ha el luvrau e pastorau e dau siu bien exempla allas olmas confidadas ad el. En sempladad ha el plidau cun Diu ell'oraziun per el e ses parochians, ed en quella medema sempladad ha el dau sia veta anavos al Scaffider.

Il sacerdot defunct vegli implorar da Diu novas clamadas sacerdotalas, novs pasturs dellas olmas per nossas pleivs romontschas. Quei tut ei stau il cuntegn dil bi riug de bara ils 15 de schaner 1980 a Sedrun - da sur professer Gieri Derungs della scola cantunala a Cuera. Cun gronda pietad ha el seregurdau digl operar dil defunct spiritual ed ha appellau al pievel ed als spirituels de rugar ed implorar da Diu benedicziun per pleivs e pievel. - Il defunct gaudi la glisch perpetna avon la fatscha de Diu. R.I.P.

Sur Christian Berther